

Powšitkowne WOZJEWJENJA

njedźelu, 14. septembra 2014

Hudźbny nyšpor w Budyskej serbskej cyrkwi

Składnostnje Budyskeje kermuše tutu njedźelu, 14. septembra, wuhotuja Małowjelkowscy dujerjo hudźbny nyšpor w serbskej cyrkwi, kotryž zahaji so we 18 hodź. Na piščelach budže cyrkwinski hudźbny direktor Friedemann Böhme hrać.

Patronatne kemše w Chróśćicach

Wobydlerjo a přistajeni Domu swjateje Ludmile w Chróśćicach woswjeća wutoru, 16. septembra, swój patronatny swjedzeń. Wutrobnje přeprošamy na swjatočnu Božu mšu w 10 hodź. do wosadneje cyrkwy.

W. Brězan

Kurs k zeznaću wěry

Kružk wěry za dorosćenych, kotřiž přihotuja so na swjatu křćeńcu, zahaji so srjedu, 17. septembra. Zajimcy njech so prošu přizjewja w farskej wikariji w Pančicach-Kukowje, Dróha Čišinskeho 35, telefonowe čisło (03 57 96) 9 62 65. Započatk je w 20 hodź. w farskej wikariji. *Farar Gabriš Nawka*

Smochčanski forum z Henriettu Kretz

Na přichodnym zarjadowanju Smochčanskeho foruma w Domje biskopa Bena pónđzelu, 15. septembra, w 19.30 hodź. předstaji Henrietta Kretz swoju knihu „Willst Du meine Mutter sein?“. W njej rysuje wona swoje hrózbne nazhonjenja jako židowka w nacionalsocialistiskim času. Tak je Henrietta Kretz jako džěćo samo zamordowanje swojeju staršeju sobu dožiwić dyrbjala. Nětko w Belgiskej bydlaca žona je mjez druhim w januaru 2012 we Łužicy była a wosebje w serbskich šulach wo svojich nazhonjenjach z džěćatstwa rozprawjala.

Putnikowanje zbrašenych do Róžanta

Putnikowanje zbrašenych do Róžanta budže srjedu, 17. septembra. Putniske kemše ze starobiskopom Joachimom Reineltom započnu so w 10.30 hodź. Po Božej mši su wšitcy putnicy do Domu swjateho Jana w Smječkecach na pisany program přeprošeni.

Biskop Reinelt přeni hósć

Nowy rjad wječornych zarjadowanjow pod hesłom „Hósć w tachantskim wobchodze“ zahaji so wutoru, 23. septembra, we 18.30 hodź. w Budyskim Ekumeniskim tachantskim wobchodze. Přeni hósć budže Drježdžansko-Mišnjanski starobiskop Joachim Reinelt.

50 lět dujerska hudźba w Chróśćicach

Dujerjo Chróšćanskeje wosady wuhotuja njedźelu, 28. septembra, w 9 hodź. Božu mšu. Na njej chcedža so Bohu dżakować, zo je přez 50 lět skutkowanje dujerjow w Chróšćanskej wosadze ze svojim žohnowanjom přewodžał. Po kemšach su wšitcy dujerjo, kotřiž su w běhu zaštych 50 lět w pozawnowym chórze na Bože ćěło w Chróśćicach službu wukonjeli, na faru přeprošeni.

Nyšpor z požohnowanjom konjacych zapřahow

Towarstwo Cyrila a Metoda, sekcija wěda a skutk, přeprošuje tež lětsa na wosebity nyšpor domchowanki z požohnowanjom konjacych zapřahow. Tutón budže njedźelu, 28. septembra, w 14 hodź. w Chróśćicach na łuce při Hatkach.

Swójbne popołdnjo w Njebjelčicach

Wšitcy wobdźělnicy ministrantskeho putnikowanja do Roma su ze swojimi swójbnymi kaž tež dalšimi zajimcami přeprošeni na zhromadne popołdnjo njedźelu, 21. septembra, do Njebjelčic. Wone zahaji so z nyšporom w 14.00 hodź. w cyrkwi. Na nim zaspěwa projektowy chór ministrantow. Spěwarjo a spěwarki zetkaja so w 13.30 hodź. na farje. Prošu přinjesće sej mapu ze spěwami sobu. Wšitcy putnicy njech sej swój putniski t-shirt a rubiško wobleku a tohorunja spěwnik „Twoje kralestwo njech přińdže“ sobu přinjesu. Nyšporej přizamknje so swačina. Prosimy wo to, zo bychy starši tykancy napjekli a sobu přinjesli. Štóz je k tomu zwólniwy, njech zdźěli to prošu pod telefonowym čislom (03 57 96) 8 87 07. Po swačini budźetaj Christina Pólkec z Kulowca wo swojim léče jako misionarka na čas w Africe a Franc Čornak z Chróscic wo swojich dožiwjenjach jako wandrowski rozprawjeć. Z wobrazowej prezentaciju móža wšitcy na ministrantske putnikowanje wróćo zhladować.

Dekanatne dušepastyrstwo we Worklecach

Eksercicije w Drježdźanskim domje Wysoke duby

Dny rozpominanja a modlenja wotměja so wot pjatka, 10. oktobra, we 18.00 hodź. hač do njedźele, 12. oktobra, připołdnja w eksercicijnym domje Wysoke Duby w Drježdźanach. Jezuitski pater Willi Lambert je k temje „Z čeho je wěra žiwa – Eucharistija a žiwjenska kultura“ přewjedže. Wón budže w němskej rěči přednošować, modlitwy a kěrluše budu serbske. Tež mjelčenje a wuměna nazhonjenjow budžetaj wobstatk tutych dnjow. Přizjewić měli so zajimcy w Chróscicach na farje, telefonowe čisło (03 57 96) 8 04 00 abo pola Marije Clausenoweje, telefonowe čisło (01 52) 52 05 71 88.

Sinfoniski koncert z Judit Kubicec w Budyšinje

Serbski ludowy ansambl a Drježdźanska Sinfonietta přeprošujetej na zhromadny koncert njedźelu, 21. septembra, w 17.00 hodź. do Němsko-Serbskeho ludoweho dźiwadła w Budyšinje. Pod hudźbnym nawodom dirigentki Judit Kubicec zaklinči Serenata Notturna w D-dur Wolfganga Amadeusa Mozarta, 8. sinfonia Ludwiga van Beethovena kaž tež kompozicije Luigija Dallapiccole, Sebastiana Elikowskeho-Winklera a Antonína Dvořáka.

Skupina DeyziDoxs předstaji swoju nowu CD

Składnostnje wudaća druheje CDje z titulom „cognitio...a moja nadźija“ přeprošuje skupina DeyziDoxs na koncert, kotryž budže sobotu, 20. septembra, w Nuknicy. Spočatk swjedženja budže w 20 hodź. Nimo DeyziDoxs budžetaj na tutym wječoru skupinje Black Tequila ze Złego Komorowa/ Drježdźan a Drunken Bitches z Kamjenca hrać.